

TEZAUUR LITURGIC
10 FEBRUARIE

ACATISTUL
SF. MUCENIȚE
VALENTINA
DE LA
CEZAREEA
PALESTINEI



MOSCOVA, 2000



Акафист мученице Валентине Кесарийской

Кондак 1

Избранная Господом для свидетельства истинныя веры, мужественно поправшая языческое нечестие и за своя страдания нетленным венцем от Жениха Христа увенчанная, святая мученице Валентино, ныне ублажаем святую память твою. Ты же, яко имущая дерзновение ко Господу, молися за ны, прославляющих тя и с верою вопиющих:

Радуйся, святая мученице Валентино, силу любви своея к Богу явившая.

Икос 1

Ангельскую чистоту в земном житии своем непорочно сохранила еси, святая мученице Валентино, ныне же в чертозе Жениха Твоего со Ангелы вкупе воспеваеши Богу Трисвятую песнь на небеси. Мы же, чистоту жития твоего девственнаго прославляюще, хвалебное пение приносим ти сие:

Радуйся, нескверная и чистая дево.

Радуйся, Господу верность сохраняющая.

Радуйся, Его паче всего возлюбившая.

Радуйся, во благочестии пожившая.
Радуйся, тем Христу угодившая.
Радуйся, в страхе Божиим пребывшая.
Радуйся, мир суетный победившая.
Радуйся, мучением своим веру во Христа засвидетельствовавшая.
Радуйся, жизнь вечную унаследовавшая.
Радуйся, в рай Божий всельшаяся.
Радуйся, венцем нетленным увенчанная.
Радуйся, в Царствие Небесное вшедшая.
Радуйся, святая мученице Валентино, силу любви своея к Богу явившая.

Кондак 2

Видя Господь душу твою силою дивною исполнену, яви тя, достохвальная Валентино, адаманта твердейшу, да мужественно исповедаеши веру истинную во Христа Иисуса вкупе со святыми девами Еннафою и Павлою, воспевая Ему: Аллилуиа.

Икос 2

Разумом своим, просвещенным от Бога, познала еси, святая мученице Валентино, яко идоли не можаху спасти души твоея. Егда же наста час испытания твоего, предана была еси на судище неверных, идеже правитель Фирмилиан в непочитании языческих богов

обвини тя. Ты же, приведенная в языческий храм для поклонения идолом, отвергнув тебя, камень дерзостно в жертвенник идольский вергла еси, воскликнувши: "Токмо Христос спасе душу мою!" Темже, прославляя велию веру твою, вопием:

Радуйся, славная дочь Кесарии.

Радуйся, подвигом своим земное отечество твое прославльшая.

Радуйся, за Христа мужественно пострадавшая.

Радуйся, благодатию Его хранимая.

Радуйся, помощью Божиею врага посрамившая.

Радуйся, в руке Божии душу свою предавшая.

Радуйся, кровь свою пролившая на земли.

Радуйся, Сыном Божиим прославлена на небеси.

Радуйся, яко с девами в лице святых пребываеши.

Радуйся, яко с ними Христа вечно восхваляеши.

Радуйся, благами нетленными наслаждающаяся.

Радуйся, ихже наследниками быти и нам ходатайствующая.

Радуйся, святая мученице Валентино, силу любви своея к Богу явившая.

Кондак 3

Сила Вышняго даде тебе, дивная мученице, укрепление на тяжкия страдания телесе твоего, да не убоишися лютаго прещения. Ты же на мучения, якоже на брачный пир, с радостию потекла еси, да возможеши Царствие Небесное наследовати и благодарственно пети со Ангелы: Аллилуиа.

Икос 3

Имущи крепкую надежду токмо на Единого Бога, агнице Христова Валентино, не повинулася еси велению мучителя воздати жертву идолом мерзким и не убоялася еси грядущих мучений. Темже, удивляяся силе духа твоего, в немощнем телеси твоём пребывающей, умиленно поем ти:

Радуйся, мучения велия претерпевшая.

Радуйся, Христу верность сохраняющая.

Радуйся, Его ради много пострадавшая.

Радуйся, венец мученический от Него радостно приявшая на небеси.

Радуйся, Христа всем сердцем возлюбившая.

Радуйся, жизни своея Его ради не пощадившая.

Радуйся, Ангелом Божиим дивно хранимая.

Радуйся, Господом присно любимая.

Радуйся, юность свою Христу посвятившая.

Радуйся, кровь свою за Него излившая.

Радуйся, во Царствии Его вечно пребывающая.

Радуйся, во обителях Небесных о нас молящаяся.

Радуйся, святая мученице Валентино, силу любви своея к Богу явившая.

Кондак 4

Буря ярости и гнева мучителя твоего не возможе поколебати храма души твоея, страстотерпице Христова, основан бо бе на твердом веры Христовы камени. Темже и в лютых страданиях, Господом укрепляема, ты веру несумненну соблюла еси, воспевая победительную песнь: Аллилуиа.

Икос 4

Слышав жестокий мучитель твой, чудная мученице Валентино, яко Господа Иисуса воспеваеши верно, якоже лютый змий устремися на кроткую душу твою, лестию сладкою надеяся уловити тя в сети своя, но ничтоже успев, разгневался зело и предаде тя на лютыя страдания. Мы же, тебе состраждуци, со слезами глаголем:

Радуйся, силою Христовою укрепленная.

Радуйся, сего ради мучителем не одоленная.

Радуйся, огонь мучений претерпевшая.

Радуйся, к Богу любовью горевшая.

Радуйся, сладость любви тоя познавшая.

Радуйся, любви ради Христовы подвиг
страдальческий совершившая.

Радуйся, люто по ребрам биенная.

Радуйся, мучителей терпением своим
удивившая.

Радуйся, подражательнице Христовых
страстей бывшая.

Радуйся, с Ним во веки на небесех
пребывающая.

Радуйся, образ любви и мужества в себе
показавшая.

Радуйся, о горнем помышляти нас
научающая.

Радуйся, святая мученице Валентино, силу
любви своея к Богу явившая.

Кондак 5

Боготечною звездою явилася еси,
приснопамятная мученице, егда светом веры
Христовы многия просветила еси. О, чудная
дево святая, ты на небеси душею своею сияеши
у престола Божия, молися о нас, да сияет свет
истинныя веры и в наших смиренных сердцах,
поющих Творцу света песнь: Аллилуиа.

Икос 5

Видевши нечестивый мучитель велию веру твою, мученице Христова Валентино, ничимже колеблему, предаде тя на страдания, ихже ты мужественно претерпевши, душу твою радостно в руке Господа твоего предала еси. Мы же, вспоминая славную победу твою над врагом рода человеческого, вопием ти сице:

Радуйся, веру во Христа до конца сохранившая.

Радуйся, райскую сладость вкусившая.

Радуйся, к лику святых дев сопричтенная.

Радуйся, славою велиею на небеси почтенная.

Радуйся, к Царствию Небесному путем тесным шествовавшая.

Радуйся, в радость Господа твоего радостно вшедшая.

Радуйся, образ терпения нам показующая.

Радуйся, любящим Бога во всем пособствующая.

Радуйся, славить Его всегда нас научающая.

Радуйся, помыслы благия во умы наша влагающая.

Радуйся, мир сей и вся его прелести презревшая.

Радуйся, и нас отвергати вся мирская и скоропреходящая призывающая.

Радуйся, святая мученице Валентино, силу любви своея к Богу явившая.

Кондак 6

Проповедует весь мир христианский славныя подвиги твоя, добропобедная Валентино, имиже прославила еси Христа Бога нашего, Емуже воспеваеши ныне в неизреченней славе песнь хвалебную: Аллилуиа.

Икос 6

Воссияла еси велиею ревностию по Бозе Вседержителю, мученице Христова Валентино, сего ради вся угрозы и прещения ни во чтоже вменила еси и на вечное усечение вкупе со святою девою Еннафою, радостно шедши, всем сердцем Господа благодарила еси, яко сподоби тя мученический венец прияти. Темже, взирающе на велию крепость души твоея, с любовью глаголем ти сице:

Радуйся, Богу во всем угодившая.

Радуйся, свято и непорочно пред Ним ходившая.

Радуйся, Духом Святым наставленная.

Радуйся, светом Христовым просвещенная.

Радуйся, идолы во уметы вменившая.

Радуйся, боги языческия поправшая.

Радуйся, тобою бо идолопоклонницы
посрамишася.

Радуйся, тобою бо Единому Господу
покланяться научишася.

Радуйся, яко мучений и лютыя смерти не
убоялася еси.

Радуйся, яко чрез мечное усечение с Господом
сочеталася еси.

Радуйся, жити во благочестии нас
наставляеши.

Радуйся, в истинней вере нас укрепляеши.

Радуйся, святая мученице Валентино, силу
любви своея к Богу явившая.

Кондак 7

Хотя Владыка и Господь Славы явити вас,
святые мученицы Валентино, Еннафо и Павло,
яко светильницы, во тьме светящая и светом
Христовым всех просвещающая, призва вас на
подвиг страдальческий, да видящий мужество
ваше и твердую веру вашу покаются в своих
заблуждениях и вкупе со избранными да
вопиют: Аллилуиа.

Икос 7

Новаго чуда быша свидетелие людие града
Кесарийскаго, видяще святые мученицы
мужественно вся страдания за Христа

переносящая. Сего ради, увидевши велию веру их, многия увероваша в Господа, восклицая: "Велик Бог христианский!" Мы же, рцем им похвалы сия:

Радуйтесь, святии страстотерпицы, многих ко Христу приведшии.

Радуйтесь, собою, яко звездами, небо церковное украсившии.

Радуйтесь, в лице святых сияющие.

Радуйтесь, Бога за нас непрестанно умоляющие.

Радуйтесь, исповедников имени Иисусова велелепая славо.

Радуйтесь, служителей Христовых украшение пресветлое.

Радуйтесь, трие святии мученицы, Троицу Божественную страданьми своими прославльшии.

Радуйтесь, и нас покланяться в триех лицах Единому Богу научающие.

Радуйся, многострадальная Еннафо, строгание телесе твоего мужественно терпевшая.

Радуйся, главу свою за главу Церкви Христа радостно под меч преклоньшая.

Радуйся, непобедимая мученице Павло, мучения за истину претерпевшая.

Радуйся, страдании своими в радостный чертог Небесный вшедшая.

Радуйся, святая мученице Валентино, силу любви своея к Богу явившая.

Кондак 8

Странно и страшно бысть страдание твое за Христа людем не ведущим Бога, присноблаженная Валентино. Ты же, с радостию прияла еси мучения за Сладчайшаго Жениха своего, и кровию неповинною душу свою убелив, хвалу воспевала еси Творцу: Аллилуиа.

Икос 8

Вся суетныя прелести и радости мира сего призрела еси, святая мученице Валентино, и всем сердцем Господа возлюбивши, жертву спасительную Ему принесла еси. Сего ради и мзду велию на небеси стяжала еси, яже нетленна пребыва во веки. Мы же, с любовию тебе воспеваем:

Радуйся, вся до конца претерпевшая.

Радуйся, течение добре скончавшая.

Радуйся, душу свою убелившая кровию мученическою.

Радуйся, Пасху вечную на небеси вкушающая.

Радуйся, Хлебом небесным питающаяся.

Радуйся, питием нетленным на небеси
напоешься.

Радуйся, милость от Бога всем верным
приносящая.

Радуйся, прощения грехов наших у Бога
просящая.

Радуйся, усердной молитве научающая.

Радуйся, нашим прошениям скоро
внимающая.

Радуйся, от горьких мучений нас
избавляющая.

Радуйся, о нашем спасении пред Господом
ходатайствующая.

Радуйся, святая мученице Валентино, силу
любви своея к Богу явившая.

Кондак 9

Все естество ангельское возрадовася зело,
видя тя, святая мученице Валентино, истинным
Богом Христа исповедавшую и мужественно вся
козни вражия победившую. Ныне же в чертозах
Небесных купно со Ангелы и всеми святыми
веселишися, поя: Аллилуиа.

Икос 9

Ветийство человеческое не возможе по
достоянию восхвалити тя, всеблаженная
Валентино, за вся страдания твоя, яже

претерпела еси за возлюбленнаго тобою Христа. Темже, ублажая мученическую кончину твою, поем со умилением сие:

Радуйся, Ангелов терпением удивившая.

Радуйся, чистотою души твоея вся небеса возвеселившая.

Радуйся, ликом святых радостно приятая.

Радуйся, со всеми святыми Престолу Славы Божией предстоящая.

Радуйся, молитвеннице наша усердная.

Радуйся, ходатаице наша присная.

Радуйся, яко от клеветы нас избавляеши.

Радуйся, яко от козней вражиих нас защищаеши.

Радуйся, ко блаженству вечному нас руководящая.

Радуйся, к небеси путь нам указующая.

Радуйся, сердец наших услаждение.

Радуйся, в истинней вере укрепление.

Радуйся, святая мученице Валентино, силу любви своея к Богу явившая.

Кондак 10

Спасения и вечнаго покоя достигла еси, страстотерпице святая Валентино, претерпела бо еси многия скорби и мучения в земном житии твоём. Научи же и ны, грешныя, шествовати правым путем, ведущим в жизнь вечную, да

купно с тобою и всеми святыми воспеваем
Создателю нашему: Аллилуиа.

Икос 10

Стена еси и надежное прибежище, мученице
Христова Валентино, всем жаждущим спасения,
о нихже в молитве пред Богом ходатайствуеши.
Темже и нам, с любовью к тебе припадающим,
буди покров и ограждение непреоборимое от
враг видимых и невидимых, да тобою водимии
внидем в радость Господа нашего и веселящися
о Бозе, воспоем ти радостно:

Радуйся, помощнице наша преблагая.

Радуйся, заступнице наша крепкая.

Радуйся, мучеников красото.

Радуйся, крепкое христиан прибежище.

Радуйся, Бога любить всем сердцем нас
научающая.

Радуйся, прощати обиды нас наставляющая.

Радуйся, свете небесный во мраце жития сего
светящий.

Радуйся, огонь любви к Богу и ближним,
присно горящий.

Радуйся, зрением славы Божия присно
утешающаяся.

Радуйся, видением Лица Его присно
услаждающаяся.

Радуйся, тайны Божия созерцающая.

Радуйся, со Ангелы Господа присно прославляющая.

Радуйся, святая мученице Валентино, силу любви своея к Богу явившая.

Кондак 11

Пение умиленное приносим ти, достославная Валентино, да соединиши его с пением Ангельским на небеси, и воспевая zde страдания твоя, сподобимся молитвами твоими непрестанно славити Бога со святыми вкупе, поюще: Аллилуиа.

Икос 11

Светоприемную свещу зрим тя, святая мученице Валентино, светом веры Христовы озаряющую всех приходящих к тебе и твоея святыя помощи просящим. Не отрини убо молений наших, но принеси их пред престолом благодати Господней, да поем ти со умилением:

Радуйся, упование наше непостыдное.

Радуйся, утешение наше присное.

Радуйся, скорая наша помощнице.

Радуйся, всем нам добрая наставнице.

Радуйся, телес наших здравие.

Радуйся, душ наших спасение.

Радуйся, яко молитвами твоими от бед избавляемся.

Радуйся, яко ходатайствы твоими милости Божия сподобляемся.

Радуйся, свеще, путь во тьме освещающая.

Радуйся, молитвеннице наша, нас защищающая.

Радуйся, на небеси в сонме святых пребывающая.

Радуйся, с мученики тамо ликующая.

Радуйся, святая мученице Валентино, силу любви своея к Богу явившая.

Кондак 12

Благодать свыше испроси нам, всеславная дево Валентино, прилежно молящимся тебе, и прощение всех согрешений наших. Не престай помогати нам, немощным, славящим тя и вопиющим о тебе Богу: Аллилуиа.

Икос 12

Поюще страдания твоя, мученице Христова Валентино, удивляемся мужеству твоему и терпению и, восхваляя Господа, даровавшего нам толикую теплую молитвенницу, вопием ти:

Радуйся, моления и прошения наша приемлющая.

Радуйся, за ны пред Престолом Божиим молящаяся.

Радуйся, у Бога милости нам непрестанно просящая.

Радуйся, от нечаянных бед и зол непреложное наше избавление.

Радуйся, от бед и напастей тихое прибежище.

Радуйся, уз греховных скорая решительнице.

Радуйся, болезнующих безмездная целебнице.

Радуйся, от клеветы нас избавляющая.

Радуйся, от навета злых человек нас сохраняющая.

Радуйся, Ангелов чудное веселие.

Радуйся, мучеников красото.

Радуйся, крепкое христиан упование.

Радуйся, святая мученице Валентино, силу любви своея к Богу явившая.

Кондак 13

О всеславная и великоименитая мученице Христова Валентино, девства и чистоты хранительнице. Приими от недостойных раб твоих сие малое моление, с любовью тебе приносимое, и испроси у Христа Бога даровати нам чистоту душевную и телесную, да тако возможем внити в Царствие Небесное и купно с тобою сподобимся воспевати хвалу Богу: Аллилуиа.

Сей Кондак читается трижды, затем Икос 1 и Кондак 1.



**ПОЛНЫЙ
АКАФИСТНИК
КАНОНИЧЕСКИЙ**

**АКАФИСТЫ
КО ГОСПОДУ БОГУ
ПРЕСВЯТОЙ
БОГОРОДИЦЕ
АРХАНГЕЛАМ
И АНГЕЛАМ**

І

**НУЖЕ
НЕБО**